



---

**Sujet:**  
**Nundefahne,**  
**s Fasnachtsmuseum muess jetzt aane**

Was machsch, wenn ebbis wottsich erhalte  
und fescht in lieber Erinnerung wottsich bhalte?  
De leggsches scheen und guet uff d Syte  
und konserviersch es fir die speetere Zyte.  
D Fasnacht in alle Sparte, alle Variatione  
wurd sich firs konserviere sauguet lohne.  
Drum muess jetz also – nundefahne  
das Fasnachtsmuseum ändlig aane!

Uff unserem Waage hetts Fasnachtsfigure  
die machen e zimmlige Stai - e suure.  
Si kennes halt aifach nit verstoh,  
das Fasnachtsmuseum isch allewyl nonig do!

**dr Waggis**

Je suis dr Schambediss uss Hagedaal,  
sacré, des isch doch nit normal.  
Die Bâloise machen is in aller Rüh  
unseri Frontière de Huningue züe.  
Pour aller en Ville de Bâle  
mache mir e Détour, findsch des normal?  
Nämmed toute suite dr Finger zem Derrière üss  
s brüücht Waggis in däm Fasnachtshüüs!

**dr Altfrangg**

Eh Adie - s isch esoo, dass ich vom Baslerdaig  
mi eigendlich nit gärn unterem Fuessvolgg zaig.  
Doch an dr Fasnacht rissts mi halt aifach mit,  
denn bini e richtige „Gäll, Du kennsch mi nit?“  
Under dr Larve machts mer hailoos Spass  
inkognito, drei Daag so richtig uff dr Gass.  
Als Brugg iber die fasnachtsloosi und faadi Zyt,  
wärs guet, wenn s Fasnachtsmuseum ändlig git.

**dr Harlekin**

Mir gseht mes sicher zimmlig a,  
dass ich d Fasnacht erfunde ha.  
Niemert ka so guet pfyffe, drummle  
und zaggiger dur d Gasse bummlle.  
Ich bin e Primadonna uffem Piccolo,  
als Drummelhund lon ich d Staiablaader stoh.  
E Statue vo mir miesst eigendlich in däm Museum stoh,  
vorwärts - worum isch s Fasnachtsmuseum nonig do?!

**dr Ueli**

Ich bin e Narr uss altem Holz  
und do druff bin i richtig stolz.  
An dr Fasnacht hett dr Bürger bis zem Knächt,  
drei Daag lang gege d Obrigkait e Rühgerächt.  
Denn mues me wieder d Schnuure halte  
und die Heechere lo schalte und lo walte.  
Dass Spott und Ironie aber nit vergässe goht  
wärs Zyt, wens Fasnachtsmuseum ändlig stoht.

**dr Bebbi**

In dr Altstadt duets in alle Gasse, allen Egge  
so rächt no myner Basler Haimet schmegge.  
Doch haimeligi Baize verschwinde nodisnoh  
und dien is so schregglici Szeneläade hinderloo.  
An dr Fasnacht schmeggts - jo mi Seel -  
no Kebab, Wirscht und Pommesfrites-Eel.  
drum sott me wirglicg jetz bressiere  
und s Fasnachtsmuseum ändlig lanciere.

**dr Muffdi**

He Mann, ich bi Muffdi vo Fäldbärgstross,  
in mynere Gugge isch krass vyl loos.  
Ich due uff mym Tuba mega lutt bloose,  
kunnsch au Glarablatz am Zyschdig zum loose?  
In Bläsischuel mir mache Larve mit Ballon,  
dr Lehrer sait, isch guet für Integration.  
Isch Fasnacht au wichtig für my und für Ali,  
jetzt mache Museum und das dalli dalli.

**d Schloofhuube**

„Länggts no?“, froog ich ganz schyych a,  
ich bi spoot, will ich so herrlig pfuuse ka.  
Doch s isch fir mi au en ächti Stroof,  
will ich regelmässig Wichtigs verschloof.  
Doch fir s Fasnachtsmuseum, däre guete Sach,  
bliib ich gärn uff und none bitzli wach.  
Drum Basler wachet uff, bevor es isch z spoot,  
lueget, dass das Fasnachtsmuseum ändlig stoht.

Zue däne Figure uff unserem Waage,  
gits eigendlich fascht nit meh z saage.  
S git nit me z joomere und au nit meh z bälle,  
uff s Fasnachtsmuseum frait sich - d Rhywälle!